



Broj: **03/1-50-14-7-48/18**

Sarajevo, 25. 7. 2018.

**PREDMET: Sastanak predsjedavajućeg Zajedničke komisije za odbranu i sigurnost BiH Sifeta Podžića s polaznicima 7. klase visokih studija Škole nacionalne odbrane Univerziteta odbrane Ministarstva odbrane Republike Srbije, Sarajevo, 26. 4. 2018.**

Predsjedavajući Zajedničke komisije za odbranu i sigurnost BiH Sifet Podžić primio je 26. aprila 2018. godine u Sarajevu polaznike 7. klase visokih studija Škole nacionalne odbrane Univerziteta odbrane Ministarstva odbrane Republike Srbije s načelnikom visokih studija sigurnosti i odbrane pukovnikom Goranom Župcem na čelu.

Na sastanku, kojem je prisustvovao i parlamentarni vojni povjerenik BiH Boško Šiljegović, predsjedavajući Zajedničke komisije Sifet Podžić informirao je goste iz Beograda o dobrim bilateralnim odnosima između parlamentarnih komisija/odbora za odbranu i sigurnost BiH i Republike Srbije.

Podžić je podsjetio na to da je Kolegij Zajedničke komisije u periodu od 27. do 29. marta ove godine boravio u radnoj posjeti institucijama zakonodavne i izvršne vlasti Republike Srbije. U okviru te posjete održan je i sastanak s državljanima Bosne i Hercegovine koji su polaznici Vojne akademije, Škole za generalštabno usavršavanje, Škole za komandno-štabno usavršavanje i Visokih studija sigurnosti i odbrane, na kome su članovi Zajedničke komisije i parlamentarni vojni povjerenik informirali 29 polaznika iz Bosne i Hercegovine o aktivnostima Zajedničke komisije, o aktuelnoj političkoj situaciji u Bosni i Hercegovini te njihovom viđenju stanja u sektoru odbrane Bosne i Hercegovine.

Podžić je gostima iz Srbije prezentirao organizaciju i osnovne nadležnosti Zajedničke komisije za odbranu i sigurnost BiH, naglašavajući da Zajednička komisija, osim informacija koje dobiva od Ministarstva odbrane BiH, Ministarstva sigurnosti i drugih institucija, vrši i terenske posjete jedinicama i komandama Oružanih snaga BiH (OSBiH) kako bi stekla uvid u realno stanje i na taj način, u saradnji s odgovornim licima u Ministarstvu odbrane i OSBiH, rješavala aktuelne probleme u sektoru odbrane u našoj zemlji.

Parlamentarni vojni povjerenik BiH Boško Šiljegović upoznao je delegaciju iz Srbije s modelom zaštite ljudskih prava i osnovnih sloboda uniformiranih vojnih lica u OSBiH, prezentirajući glavne aktivnosti kojima se bavi Ured parlamentarnog vojnog povjerenika u našoj zemlji.

Načelnik Visokih studija sigurnosti i odbrane pukovnik Goran Župac zahvalio se na srdačnom prijemu i upoznao domaćine s programom i načinom rada Škole nacionalne odbrane, apostrofirajući internacionalni karakter Visokih studija sigurnosti i odbrane. Posebno je istaknuo dobre rezultate koje ostvaruju polaznici iz Bosne i Hercegovine.

Tokom sastanka razgovaralo se o bilateralnoj saradnji oružanih snaga dvije zemlje. Saradnja se, između ostalog, ogleda u programima obuka vojnih lica, odnosno njihovom tehničkom, informatičkom i stručnom usavršavanju, rečeno je na sastanku.

**PREDSJEDAVAJUĆI KOMISIJE**  
**Sifet Podžić**

Dostavljeno:

- naslovu
- a/a